

გორში მედპერსონალის აცრა დაიწყო

15 მარტი 2021

გორში COVID-19-ის საწინააღმდეგო ვაქცინით აცრის პროცესის მიმდინარეობას შიდა ქართლის სახელმწიფო რწმუნებული მამუკა სალარეიშვილი რწმუნებულის მოადგილესთან სიმონ გულედანთან ერთად ადგილზე გაეცნო.

„დღეიდან ჩვენს რეგიონში ვაქცინაცია დაიწყო. COVID-19-ის საწინააღმდეგო ვაქცინის 2 600 დოზა შიდა ქართლის ოთხივე მუნიციპალიტეტში უკვე გადანაწილებულია. ასევე, იმ სამედიცინო დაწესებულებების პერსონალს, სადაც აცრები მიმდინარეობს, გავლილი აქვს შესაბამისი გადამზადება. პირველ ეტაპზე, COVID-19-ის საწინააღმდეგო ვაქცინაციით აიცრება ჯანდაცვის სექტორში დასაქმებული ყველა პირი. ვაქცინაცია ინფექციისაგან დაცვის ეფექტური და უსაფრთხო საშუალებაა, შესამაბისად მნიშვნელოვანია გაითვალისწინოთ როგორც ჯანმრთელობის მსოფლიო ორგანიზაციის, ისე ჯანდაცვის უწყებების რეკომენდაცია და ჩაიტაროთ აცრა.“ - განაცხადა მამუკა სალარეიშვილმა.

ვაქცინის 2600 დოზიდან გორს - 1200, ქარელს - 400, კასპსა და ხაშურს კი 500-500 ცალი გადაეცა. რეგიონში აცრების ჩატარება შემდეგ ლოკაციებზეა შესაძლებელი:



გორში - „გორმედი“ და ს.ს.ი.პ. გიორგი აბრამიშვილის სახელობის თავდაცვის სამინისტროს სამხედრო ჰოსპიტალი;



ქარელში - „გორმედის“ ფილიალი;



ხაშურში - „ახალი კლინიკა“;



კასპში - „მედალფა“.

ჯანდაცვის სფეროში დასაქმებული პირების ვაქცინაცია ხორციელდება სპეციალურ ონლაინ პლატფორმაზე რეგისტრაციის მიხედვით. ელექტრონულ სისტემაში სამედიცინო პერსონალის რეგისტრაცია 13 მარტიდან მიმდინარეობს. COVID-19-ის საწინააღმდეგო ვაქცინაციას ექვემდებარება ჯანდაცვის სექტორში დასაქმებული ყველა პირი.

